

NCER jana pelaburan RM27.27 bilion
Utusan Online
25 Mac, 2012

TAIPING 24 Mac - Kerajaan mengenal pasti 26 Projek Titik Permulaan (EPPs) yang bakal dilaksanakan di bawah inisiatif Wilayah Ekonomi Koridor Utara (NCER) menjelang 2025 dengan janaan pelaburan dijangka mencecah RM27.27 bilion.

Timbalan Perdana Menteri, Tan Sri Muhyiddin Yassin berkata, projek terbabit yang dikenal pasti melalui Kajian Makmal Bandar Raya Koridor dan Wilayah (C&C Lab), dijangka memacu industri utama di utara Semenanjung iaitu Perlis, Kedah, Pulau Pinang dan Perak.

Katanya, sepanjang tempoh itu pelaksanaan kesemua projek berkenaan dijangka menyumbang RM17.46 bilion kepada Keluaran Dalam Negara Kasar (KDNK).

"Kerajaan telah mengambil pendekatan melalui C&C Lab untuk menyerlahkan lagi usaha-usaha membangunkan ekonomi di wilayah ini secara seimbang dan saksama.

"Dalam hal ini, C&C Lab, pihak NCER dengan kerjasama pelbagai agensi awam dan swasta akan mengenal pasti lebih banyak sektor ekonomi yang berpotensi untuk dimajukan di kawasan berkenaan," katanya dalam teks ucapan yang dibacakan Menteri di Jabatan Perdana Menteri, Tan Sri Nor Mohamed Yacop (**gambar**) pada perasmian Hari Terbuka Koridor Utara C&C Lab 2012 di sini hari ini.

Timbalan Perdana Menteri berkata, pada 2011 NCER menarik pelaburan RM9.91 bilion yang mengatasi jumlah dicatatkan pada 2010 iaitu RM6.06 bilion.

"Jumlah peluang pekerjaan yang berjaya dijana oleh NCER bermula Januari 2010 sehingga 2011 adalah sebanyak 26,267 dan jumlah itu melepasi sasaran awal iaitu 22,000," katanya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0325&pub=Utusan_Malaysia&sec=Dalam_Negeri&pg=dn_02.htm